

# LIWAKATE TIAGO

Tiago ane idí nagadi liwakate anigijaa nigijo Tiago, nioxoa João, Herodes ane diigenatakata moyeloadi. Pida nigini Tiago ane idí nagadi liwakate бага Jesus nioxoa. (Awiniteloco Mateus 13.55; Marcos 6.3; Gálatas 1.19). Tiago lacilo loiigi Cristo digoida nigotaga Jerusalém. (Awiniteloco Atos 15.13). Didikotibige loiigi Goniotagodi ane ilaagitibigiwaji leegodi romaanotedi moiatetibigiwaji. (Awiniteloco 1.1).

Tiago eo loniciwaga nigjoo anoiatetibece me datiteteloco monakato Goniotagodi, codaa me degeyamagaticoace. Yakadi me ninitibigiwaji leegodi Aneotedogoji midioka limedi me yaxawatediogi, idaagida me nawikodeega. Tiago yalagata me leeditibige me jaoga nigina ane niigetedogowa Aneotedogoji, leegodi agica ane jaoga nigina oko daga wajipatalo lotaga Aneotedogoji, pida ageyiwagadi. Nigina oko anewi metiwagataka idioka limedi meo nigina Aneotedogoji ane iigete. Agele diginoka jilenagatibigo niginoa liicotedi, oada agotigica jaoga niginoa madewetedi, leegodi Aneotedogoji idokida anigotediogi inatawece oko. Tiago yalagata me leeditibige me jajacagataga gonioladi, codaa eledi yalagata me degele me jemaanaga niginoa aninoatigi digoina iigo. Leeditibige me jowooga nigida godewiga digoina iigo aleegi, yediiga me ixomagatice. Nogowidijedi lotaga Tiago yalagata me degele me jikanaga me jotaganaga Aneotedogoji, pida leeditibige me nalagatibigogoji anodaagee Elias me yotaganega Aneotedogoji.

## Tiago yecoaditibige nigina anonakato Goniotagodi

**1** <sup>1</sup>Ee, Tiago, ee liotagi Aneotedogoji iniaa Goniotagodi Jesus Cristo. Idecoaditibige inatawece nigina anonakato Goniotagodi, nigina judeutedi ane ilaagiteloco inoatawece nipodaga.

## Gotiwagatakanegegi inaa godixakedi

<sup>2</sup>Inioxoadipi, oleetibige midioka limedi maniniitibece nigina micotagalocotiwaji inoatawece ane latopaco nawikodico. <sup>3</sup>Igaataga owoogotiwaji niginoa nawikodico moiikee anodaageni manakatoni Goniotagodi, codaa mowo mepaanaga gadoniciwati mabootege eletidi gadawikodicotiwaji. <sup>4</sup>Pida jinaga domaga anigaaxetiwaji madinatiitalo gadawikodico amanagawini akaami nigica oko ane daga nagamalaga metiwagataka, me digica gabatiigi, codaa me digicata daganiaditibige gatiwagatakanegegi me gadewikitema Aneotedogoji. <sup>5</sup>Nigica oko gadiwigotigitiwaji ane digica lixakedi, oada ele me dipokotalo Aneotedogoji, oada ja yajigote lixakedi. Igaataga Aneotedogoji ja igo

me yedia okanicodaagica oko, adaciiletetema, codaa adiojotetece. <sup>6</sup>Pida nigina oko me dipokotalo Aneotedogoji leeditibige meyiwaagadi Aneotedogoji mewi me yajigote ane lipoketegi, codaa leeditibige me daga dawienataka. Igaataga nigina oko ane dawienataka liciagi niginoa ebekadi catinedi akiidi-eliodi. Nigina niocodi enaketedibige ebekadi, odao yadeegiticogi okanicodaagica ane yemaa meyaticogi. <sup>7</sup>Nigina oko ane dawienataka ayakadi me nibeotege Goniotagodi me yajigote anigetigidi anele. <sup>8</sup>Codaa nigidi oko idioka limedi moiigi lowooko, codaa agica dogoyowoogodi nigica anowo.

### Icoa madewetedi icaagicoa liicotedi

<sup>9</sup>Akaami anakaami gonioxoa madewedi, aniniitibece nigina Aneotedogoji me gadawacenedibige leegodi makaami lionigi Aneotedogoji. <sup>10</sup>Codaa akaami anakaami gonioxoa liico, aniniitibece nigina Aneotedogoji meote makaami nigina ane digica ane jaoga, igaataga nigina liico icota me ma, macataga nagana niale lawogo nipodigipije anicota me ma, yadilo. <sup>11</sup>Igaataga nigina naga leegitibigimece aligege, odao ja yalegi nadegogo codaa me lawogo, odao ja ma ijo me libinienaga. Jigidaagee nigina liico micota me ma, icaagica nigaleegidaa domaga diiticogi meote noojetekico.

### Aneotedogoji ageote me jowooga me jaoga ane beyagi

<sup>12</sup>Aneotedogoji eote me ninitibece nigina oko ane dinatitalo lawikodico. Igaataga nige dinatitalo inoatawece ane lawikodico, codaa nige degeyamagatice metiwagataka, Aneotedogoji yajigote nagajegi, micataga nigina nogeedi ane dibatege nigina nalokodegecajo ane dinigaanye. Odao jigidaagee nigica nagajegi nigina oko. Aneotedogoji eote me nogeedi midioka limedi me newiga miniwataga. Codaa Aneotedogoji ligegi me yajigote nagajegi inatawece nigina oko anoyemaa. <sup>13</sup>Nigina oko minoa lawikodico anowo me yowo meo ane beyagi, ayakadi degee, "Aneotedogoji eote nigida yowoogo me jao ane beyagi." Igaataga agica ane yakadi degeo Aneotedogoji me yowo meote ane beyagi, odao Aneotedogoji ageote oko me yowo meo ane beyagi. <sup>14</sup>Pida nigina oko nige lowoogo meo ane beyagi, yowo leegotedi niginoa epaa lidagataka lolaadi, anoinaale iniaagini nigini oko. <sup>15</sup>Odao niginoa lidagataka godolaadi owo me jowooga me jaoga ane beyagi, odao idatibece ja jaoga, odao jigida gobeyacegegi. Odao nigina gobeyacegegi eo me godeleo, eo midioka limedi me leegitalo me jotonagatedice Aneotedogoji.

<sup>16</sup>Inioxoadipi yemaanigipi! Jinaga adininaalenitiwaji dagaleetibige daantiginiaa leegodi Aneotedogoji nigina me jaoga ane beyagi. <sup>17</sup>Pida inoatawece anele ane jibagatege icogotedigi miniwataga Aneotedogoji ane ideite ditibigimedi. Nigina midi ane najigotedogowa agica ananiaditice. Codaa inoatawece anele icogotedigi miniwataga Aneotedogoji, Nigijoa ane yoe aligege, epenai, codaa me yotetitedi. Inoatawece aninoa diniigi, pida Aneotedogoji baadaga diniigiteda. Nigina wa idioka limedi me doxilece, pida Aneotedogoji baadaga doxileceteda. <sup>18</sup>Leegodi mepaa yemaa me ee miniwa, odao Aneotedogoji ibake lotaga,

anewi, meote me godewigatace, micataga daga gelatace me janiigatini. Eote me godewigatace, odaa iniokiniwateda moko nepilidi, liciagi miniokiniwateda me nepilidi niginoa odoejedi nawodigijedi anonopilagaditedio noiigi judeutedi. Nigida moko godiciaco niginoa odoejedi nawodigijedi anonopilagaditedio, odaa jigidaagee nigijo negeote me godewigatace, Aneotedogoji ikee micota me igelagatidi inoatawece ane liidagatajedi.

**Leeditibige me jaoga ane liigenatakanegeco Aneotedogoji  
lotaganagaxi, idigida agele digidokida me jajipaagata**

<sup>19</sup>Enice, analakitibige inioxoadipi yemaanigipi! Inatawece oko leeditibige me nigomaga me najipaaga, odaa jinegepece agitatakani codaa jinegepece eligidee. <sup>20</sup>Igaataga nigina oko me deligide, ageo ane igenaga ane yemaa Aneotedogoji. <sup>21</sup>Enice, ikani mawiite inoatawece ane beyagi anepaa yemaa gadolaadi meo, codaa jinagaleegawii ane beyagi anidioka limesitibece mowoo mawii. Odaa adiniwikodentibece lodoe Aneotedogoji, codaa iwitece lotaga ane ixotediwece gadaalegenali. Nigidiwa lotaga micataga degelanigijedi catiwedi gadaalegena ane ili, codaa ida loniciwaga mowo me gadewikitacetiwaji.

<sup>22</sup>Pida awiitiwaji ane liigenatakanegeco lotaganagaxi Aneotedogoji. Igaataga akamaga adininaaleni nigina mokajipaata, pida agawii ane ligege Aneotedogoji. <sup>23</sup>Igaataga nigina oko ane mina wajipatalo Aneotedogoji lotaga, odaa ageo ane liigenatakanegegi, nigini oko micataga daga iwiteloco noleegaxi me diniwi anodaagee. <sup>24</sup>Nige diniwi, odaa jogopi, agica daga diniigi anee. Pida aleegi, odaa ja yaagiditigi nigijo ane latopagi. <sup>25</sup>Pida Aneotedogoji lotaga, ane digicata libatiigi, nikeetogowa anodaagejinaga, codaa ida loniciwaga me godatamagateetege gobeyacegeco. Odaa nigina oko anele me yowotece Aneotedogoji lotaga, me daga yaagiditece, codaa me dioteci ane ikeeta Aneotedogoji lotaga, odaa Aneotedogoji ibinie nigini oko nigina meo nigijo ane ligeste.

<sup>26</sup>Nigina oko nige diletibige daga diotece Aneotedogoji, pida ayajacagadi nioladi, odaa agica jaogate eliwagatakanegegi. Odaa nigini oko epaa dininaale. <sup>27</sup>Aneotedogoji, ane Godiodi, yakadi nigina oko mida eliwagatakanegegi ane digicata libatiigi, codaa mewi, nigina me yaxawa nigina eledi oko aninoa ane yopotibige, digo micataga nigaanigipawaanigi exiijigipi, codaa me wajekalodipi. Nigina oko anewi mida eliwagatakanegegi, nigini oko ane dinotetetema niginoa ane napioi ane lakataga nigina iigo.

**Leeditibige midokida ane inigatiogi inatawece oko**

**2** <sup>1</sup>Inioxoadipi, jigiwagatitewaji Goniotagodi Jesus Cristo, Nigijoa ane Niotagodi inoatawece aninoa, codaa meliodi nimawenegege liciagi Aneotedogoji ane ideite digoida ditibigimedi. Enice, jinagawii gademaanigi oko leegodi anodaagee mida moko. <sup>2</sup>Igaataga daga dakatiobece itoataale oko ane oniticetiwaji matecigi, onidateci nigidoa itoataale ani libaagateje oolo

codaa mele me dinixo, idegeledi baga madewedi, laxokodi lowoodi codaa me daa. <sup>3</sup>Odaa jiginipegele mabaatege nigijo anele me dinixo, odaa jegenita, “Anagi anicooteloco nagani baanco anele”, pida nigijo madewedi begenita, “Idiaagadabititi!”, ogoa, domigenita, “Anagi anicooti digoina iigo iwai maca inibaanco!” <sup>4</sup>Nigina nigidaagenitiwaji, jagawii nigidi oko me daga diniciamico, odaa anodaageni mowookoni, codaa anodaageni mawini oko ja beyagi.

<sup>5</sup>Anajipaatiwa akaami inioxoadipi yemaanigipi! Aneotedogoji ja iomagaditedicoace nigijoa madewetedi nigina iigo, eotedibige moyakadi meliodi eliwagatakanegegi. Nigina madewetedi owidi niliicagajetecidi digoida miniwataga Aneotedogoji, igaataga Aneotedogoji jegepaa iomagaditedicoace eotedibige me yakadi me iige laalegenali, codaa meote me lionigipi anodibatege owidi anele miniwataga, ane ligegi me yajigotediogi inatawece nigina oko anoyemaa. <sup>6</sup>Pida akamagakaamitiwaji bagademiitiogi niginoa madewetedi micataga nigina oko ane digica jaoga. Pida jiginaaginoa niginoa liicotedi anetigadiboloteenitiwaji, codaa metigadixigita goniwinogodi moibanootagadici ane ganepilidi. <sup>7</sup>Codaa jiginaaginoa niginoa liicotedi ane beyagi modotagatibige Jesus Liboonagadi anele. Aneotedogoji yajigotedagawatiwaji Liboonagadi Jesus nigijo negeniditedagawa makaami nepilidi.

<sup>8</sup>Lotaganagaxi Aneotedogoji nikeetogowa liigenatakanegegi nigijo ane Ninionigi inoatawece, niigenatakanegegi anee, “Leeditibige memaani eledi oko aneni makamaga adinemaani.” Nigoteteni nigida niigenatakanegegi, ele aneni. <sup>9</sup>Pida nigawii gademaanigi oko, jagawii ane beyagi, codaa niigenatakanegegi ikee makaami oko ane daga yotetteda liigenatakanegeco Aneotedogoji. <sup>10</sup>Igaataga nigina oko nige yotete inoatawece niigenatakanegeco, pida ida onidateci ane daga yotete, odaa Aneotedogoji laagedi nigini oko liciagi me laagedi nigijo oko ane daga yotetteda idiwatawece liigenatakanegeco. <sup>11</sup>Igaataga Aneotedogoji nigijoa anee, “Jinagagolagatakani!” Codaa eledi mee, “Jinaga aijee!” Nige daga agolagatakani, pida aijee, akaami laagedi Aneotedogoji liciagi nigijo oko ane daga yotetteda idiwatawece liigenatakanegeco. <sup>12</sup>Enice, inoatawece ane gadotaga, codaa inoatawece anawiite, awii liciagi anodaagee nigina oko ane yowoogodi Aneotedogoji me iloikatidi nige dogoyotetteda liigenatakanegeco. Niginoa niigenatakanegeco onikeetogowa anodaa gonimawenegegi me godiwoko nibeyacaga. <sup>13</sup>Igaataga Aneotedogoji icota me iwi anigoteta, codaa me iloikatidi nigina oko ane daga iwikode eledi oko. Odaa Aneotedogoji idaagee aiwikode nigini oko. Pida nigina oko ane iwikode eledi oko, Aneotedogoji baga iwikode nigini oko nige limedi me laagetedipi codaa me iloikatidi inatawece oko ane dogoyiwagaditeda.

**Leeditibige me jaxawanaga eledi oko, odaa ja  
jikeenaga me jinkatonaga Aneotedogoji**

<sup>14</sup>Inioxoadipi, nigica anokexaa ligegitibece me nakato Aneotedogoji, pida ageo ane igenaga me ikee mewi mida eliwagatakanegegi, agica jaoga nigijo

ligegitibece. Codaa Aneotedogoji ageote me yewigatace nigini oko digidoka leegodi mee mida eliwagatakanegegi. <sup>15</sup>Nigica gonioxoa, ogoa domige goniwaalo madewetedi ane digica lowoodagagi, otegexaagaga ane yeligo. <sup>16</sup>Odaa anigepidigijo nigina akaamitiwaji jagabodeni, menita, “Natiinigo, gadixigagawa Aneotedogoji! Ele maniodi, madinixomi, codaa akaamele!” Pida agajicitatiwaji nigica ane yopotibige. Odaa nigijoa gadotaga agica jaogate. <sup>17</sup>Jigidaagee mejiwagatakanaga. Digidokida mejinaga me jinakatonaga Aneotedogoji, pida anejinaga me godewiga aikée mewi me jinakatonaga, odaa gotiwagatakanegegi agica niwaló, pida liciagi nigina émegegi.

<sup>18</sup>Daga yemaa ini oko anee, “Akaami eni manakatoni Aneotedogoji. Pida ee eledi jinakato, codaa jaote anele.” Odaa jigini eledi oko ane ninigodi, mee, “Jemaa manikeenitiwa manakatoni Aneotedogoji, me digicata gabakedi anele. Pida ee бага jikeetagawa me jinakato Aneotedogoji leegodi niginoa anele ane jaote.” <sup>19</sup>Nigida makaami jowoogodi me iwagatakani mokiniwatece Aneotedogoji me Gonoenogodi. Odaa doane mele! Pida jowoogotaga codaa me niwicidi abeyacagaga oyiwagadi mokiniwatece Aneotedogoji me Gonoenogodi, codaa eliodi modoitalo. <sup>20</sup>Nagoodi ida yetole! Jikeetagawa nigina oko midokida me ligegi me nakato Aneotedogoji, pida ageo ane liigenatakanegegi, odaa nigica eliwagatakanegegi nigini oko agica niwaló. <sup>21</sup>Aneotedogoji yakadi gonelokodi Abraão nigijo jotigide me igenaga leegodi ane loenataka, nigijo naga eyiwagadi, odaa ja domaga ibotalo Aneotedogoji nigijo lionigi ane liboonagadi Isaque. Abraão eo ladienigi wetiadi, odaa ja ipeketaloco Isaque, jaigo me domaga yeloadi me yocaganege Aneotedogoji. <sup>22</sup>Leegodi me nakato Aneotedogoji, odaa jegeo ane liigenatakanegegi Aneotedogoji. Igaanegeo nigijo ane liigenatakanegegi Aneotedogoji, odaa jegepaanaga yoniciwadi eliwagatakanegegi. <sup>23</sup>Odaa jigicotece nigijo aneeta Aneotedogoji lotaganagaxi, nigijo mee, “Abraão nakato Aneotedogoji, joanigidaa leegodi Aneotedogoji me yakadi me inigina oko ane igenaga.” Odaa jegeyatedigi Aneotedogoji me “Lokaagedi Aneotedogoji”. <sup>24</sup>Odaa ja jakataga me jinataga Aneotedogoji me dibatetege oko me igenaga leegodi nigina oko meo ane liigenatakanegegi Aneotedogoji, idigida aleegodi nigina oko moka ligegitibece me nakato Aneotedogoji.

<sup>25</sup>Idaagigote Aneotedogoji nagajo iwaalo agopeloa ane liboonagadi Raabe me yakadi me igenaga leegodi loenatagi anele, nigijo mele me dibatege mini ligeladi nigijoa goneleegiwadi liigexedi Aneotedogoji loigi. Odaa Raabe yagaditiniwace nigijoa goneleegiwadi me dogoyakadi laxakawepodi, odaa jegeo mopitibeci odibata eledi naigi me digicata ane doidetema.

<sup>26</sup>Igaataga jigidaagee nigina godolaadi me digicata godiwigo miditaga, odaa jegemegegi. Jigidagaga ejinaga nige daga jaoga ane niigetodogowa Aneotedogoji me jikeenaga mewi mejiwagatakanaga, odaa gotiwagatakanegegi ja micataga nigina émegegi.

### Leeditibige me jajacagataga gonioladi

**3** <sup>1</sup>Inioxoadipi, jinigikani degeliodi nigina akaamitiwaji dogowote me niigaxinaganadi nigina matecigitiwaji. Igaataga owoogotitiwaji nigina Aneotedogoji nige iwi anigoteta oko, dagaxa me dakaketogodomi anigotedogowa nigina ane jigaxinaganagatece lotaga Aneotedogoji. <sup>2</sup>Okotawece idioka limedi minoa gobatico. Pida nigina oko ane digicata me dibatá me dotaga, joaniginiaagini nigica oko ane digicata libatigi, odaa yakadi me jajacagadi lolaadi. <sup>3</sup>Nigida moko jaogate lowacaga apolicaganaga jaogatibige me jajacagataga, odaa jakataga me jadeegagaticogi nigini eijeegagi nelegi okanicodaagica ane jemaanagaticogi. <sup>4</sup>Digowootiwaji nagana etogo-nelegi. Nigina niocodi ane yoniciwadi yamaga, pida jakataga me jadeegaga etogo-nelegi jibakenaga nolaakanagatawanigi. Odaa nagana etogo igo nigica ane yema meyaticogi nigina nawaligenatakanaga. <sup>5</sup>Jigidaagee nigida godoceligi catiwedi gonioladi. Jigidaagee me lionicawaanigi me iteloco godolaadi, nigida godoceligi catiwedi gonioladi eote me idinanenagatece niginoa anicinoa ane nelecoli.

Digawinitiwaji! Nigina galewakawaanigi yakadi meo me yabidi eliodi nialigi. <sup>6</sup>Nigida gonioladi liciagi noledi. Eetece inoatawece ane latopaco ane beyagi digoina iigo. Joanigidaagee nigida gonioladi eote inoatawece codaa eo godolaadi me napioyagadi nibeyacaga. Micataga nigida gonioladi daga noledi, nigina noledi ane daga ipe, ane diiticogi oko abeyacagaga me nawikodeega. Nigini noledi yaagadi idatawece godewiga, inatawece godolaadi, inoatawece godowooko, codaa ane godoenataka. <sup>7</sup>Nigina oko ida loniciwagateloce inoatawece ane newigateloce nigina iigo. Jogoyokaagatidi niginoa eijedi ane doide, ilaagaxodi, inoa anigotinigi iigo, codaa me nogojedi. <sup>8</sup>Pida baadigica ane yakadi me jajacagadi nigida godoceligi. Abeyacegegi nigida gonioladi, agica ane yakadi daga jajacagadi, codaa nolee weneeno ane godeloadi. <sup>9</sup>Yakadi me jibakenaga gonioladi me jogeegatalo Goniotagodi Aneotedogoji ane Godiodi. Pida eledi jibakenaga gonioladi me beyagi me jotaganagatibige eledi oko Aneotedogoji loenataka ane latopiwadi. <sup>10</sup>Idaagida gonioladi noditicogi notaga anodogetetibigimece Aneotedogoji, codaa me notaga ane beyagi ane dakapetege eledi oko. Inioxoadipi, ayakadi digidegejinaga, nigida aigenaga. <sup>11</sup>Ina ninyogodi gate, inaagina lidi ninyogodi, domigidokidata ane icogotiwece? Agidokida ane noditicogi! <sup>12</sup>Inioxoadipi, domige yakadi ana itiigadixaga me yajigo azeitona? Domige yakadi ana libatadi uuva me yajigo fiigo? Ayakadi! Codaa nigina lacilotibige ninyogodi gate ayakadi daga yajigo lidi ninyogodi.

### Ica godixakedi anewi

<sup>13</sup>Domigica gadiwigotigitiwaji oko aninoa lixaketedi, ane yowoogodi inoatawece? Nigini oko leeditibige me dinegenagadi mewaligi me ikee mida lixakedi. Codaa nigina meo loenatagi anele, odaa leeditibige me ibake lixakedi me diniwikodetibece lodoe eledi oko. <sup>14</sup>Nigida anigida gadocegegi,

codaa nige eligidee catiwedi gadaalegena, codaa migoleetibige me iigeni eledi oko madinelecagateeni, jinaga adinagaxakenitibece leegodi mida gadixakedi. Igaataga nigadinagaxakenitibece, nigida makaami awitaka, jagakapetege nigijo liigaxinaganegegi Aneotedogoji anewi. <sup>15</sup>Odaa Aneotedogoji aniginiaa yajigotedagawa nigida gadixakedi, pida nigida gadixakedi liciagi lixakedi nigina oko anida aneetege nigina iigo. Nigida nixakedi ikatece godolaadi meo ane yemaa, codaa icogoticogi minitaga diaabo. <sup>16</sup>Igaataga nigina oko me dagaxa locegegi catiwedi laalegena, codaa nigina me doletibige me yakadi nagatetigi, odaa nigina oko ailagatiwage, owote lakataga ane beyagi.

<sup>17</sup>Pida nigina Aneotedogoji me yajigote lixakedi oko, odaa nigica anee me yewiga nigini oko agica lapioyagajegi. Codaa nigini oko doletibige meo nigina eledi oko me ilagatiwage. Nigini oko inoka doletibige meo aneletema eledi oko, codaa doletibige me lokaagedi okanicodaagica oko. Codaa eliodi me iwikode eledi oko, codaa eo inokina nigina ane yaxawa eledi oko. Nigina meo nigina anele, eotema inatawece oko, agica ane dinetetema. Agokeo me dagaxa meletema eledi oko. <sup>18</sup>Nigina anodoletibige mowo eledi oko me daga nidelaga, codaa nigina mowo me dagalee dinotigimadetiwage nigina oko, otegeaagaga nidelaga, liciagi enanaganaga. Odaa nigina anonopilagaditio бага anee me newiga nigina eledi oko moyaxawa me igenagatibigiwaji.

#### Nigina ane yemaatibigo ane lakataga nigina okotigi nigina iigo

**4** <sup>1</sup>Amiina aneotiwaji makaami dinaxakawamigi, codaa madinidelegeni? Adinidelegentiwaji leegotedi niginoa lemaanaga gadaalegenali ane beyagi, joaniginaagowote memaani midele. <sup>2</sup>Domaga iatenitibigetiawaji anemaani, pida agakati, joanigidaa leegodi naga gadigomitiwaji me aijee mawii makati nigina anemaani. Alideetiawaji, pida agakati ane domegemaani. Ideletigi makati ane domegemaani, pida Aneotedogoji ayajigotedagawa leegodi atipokitalo. <sup>3</sup>Nigina mipokitalotiwaji Aneotedogoji, odaa agabaatege ane gadipoketegi, leegodi beyagi gadowooko mipoki. Igaataga inokemaanitibige Aneotedogoji me yajigotedagawa ganigidi gadolaadi ane yemaa meo.

<sup>4</sup>Nigida makaamitiwaji gadiciagi nigina ane nogolagatakanaga, igaataga jigijo makaami nepilidi Aneotedogoji, pida natigide jigikani me iwitece. Jogowoogotitiwaji nigina oko ane doletibige niginoa ane lemaanaga nigina okotigi nigina iigo, nigini oko jegeo me laxakawa Aneotedogoji. Nigina oko ane doletibige me lokaagetedipi nigina oko ane dogoyiwagaditeda Aneotedogoji, nigini oko jegeo me laxakawa Aneotedogoji.

<sup>5</sup>Jinagaleetibigetiawaji Aneotedogoji lotaganagaxi dagatooa nigijo ligegi, anee, “Aneotedogoji ixotediogoji godiwigo.

Pida nigidiaagidi godiwigo ja doletibige niginoa aninoatigi nigina iigo.”

<sup>6</sup>Pida Aneotedogoji eote mida eliodi godoniciwaga me jatamagajogotege nigina ane beyagi. Joanigidaa leegodi Aneotedogoji lotaganagaxi mee, “Aneotedogoji lakapetegi nigina anagaxakenegegipi,



pida бага yaxawa

codaa me yajigote loniciwaga nigina ane diniwikodetibece.”

<sup>7</sup>Enice, ikanitecetiwaji Aneotedogoji me iige gadewiga. Atitetiniwace aatege godaxakawa, odaa jegeloditagadomi. <sup>8</sup>Ipecitege Aneotedogoji, odaa nebi jagaga ipegitedagagitiwaji. Ikani mawii ane beyagi, akaamitiwaji anakaami abeyacagaga, micataga nigina oko me iwilegi libaagatedi ane napioi. Jinagaleegoteteni nowooko ane beyagi catiwedi gadaalegenali, akaamitiwaji anoleetibige memaani Aneotedogoji, pida agikani moleetibige memaani niginoa anicinoa aninoa nigina iigo. <sup>9</sup>Adinigecagalogotititiwaji, acaagetiwaji, codaa me anoenitibece leegodi manati gabeyacegeco. Ikani me alajikanitibece, odaa adinigecagalogotititiwaji. Ikani maniniitibece, odaa agecagalogotiti gadaalegena. <sup>10</sup>Adiniwikodenitibecetiwaji lodoe Goniotagodi Aneotedogoji, odaa jagadawacenitacedibige.

#### **Agele me beyagi me jotaganagatibige eledi oko**

<sup>11</sup>Inioxoadipi, jinagadiniliitiwage. Nigina ane diliko, ogoa, domige igoadi nioxoa, nigini oko ja beyagi me dotagatibige liigenatakanegeco Aneotedogoji, codaa me beyagi me yowo liigenatakanegeco Aneotedogoji. Nige beyagi mawinitece liigenatakanegeco Aneotedogoji, odaa nigida makaami agaleegoteteni nigijoa niigenatakanegeco, pida jagawii makaami nigoagodi nigijoa niigenatakanegeco. <sup>12</sup>Iniwa oniniwatece ane yakadi meote niigenatakanegeco, codaa me iwi oko, Nigijoa Aneotedogoji ane yakadi meote oko me yewigatace, codaa me yakadi meote oko me yeleo. Pida, bagakaami, amiijo ane yajigotagawa ganagatetigi me gadigoatita oko? Agica ane yajigotagawa!

#### **Anodaagejinaga me jowooga nigica ane jaoga natiinigo**

<sup>13</sup>Atacolitecetiwaji niginoa yotaga, akaami ane adinagaxakenitibece, nigina me eni, “Nigina noko, ogoa, domige natiinigo, iniga manitaga nagani nigotaga. Idiaagejonaga onidateci nicaagabi, jaogate gonoojetekico, odaa owidi inigaanyagatece dinyeelo.” <sup>14</sup>Agakatitiwaji midaga alitigi gagegi leegodi agowoogotitiwaji nigica ane ixomagateenitijo natiinigo. Igamodaagee gadewiga? Gadewiga liciagi nigina ewiidi nigina me nigoitijo. Aleegi mina nigina ewiidi, odaa ja ma. <sup>15</sup>Nigida makaamitiwaji leeditibige midaga gagegi motagani, “Nige yemaa Aneotedogoji, eote godoniciwaga me godewiga, odaa jaoga ane godowoogo me gobakedi.” <sup>16</sup>Pida natigide, jagadinabakenitibece leegodi makaami anagaxakenegegipi. Odaa idokeeta nigina madinabakenitibecetiwaji, odaa jagawii ane beyagi.

<sup>17</sup>Enice, nigina oko ane domaga yakadi meo anigida anele, pida ageo, nigini oko jegeo ane beyagi.



### Najoinegeco niginoa liicotedi

**5** <sup>1</sup>Natigide, akaamitiwaji anakaami liicotedi, atacolitece niginoa yotaga! Anoeni, codaa macaagetibecetiwaji leegotedi gadawikodico anenagi nigina Aneotedogoji nige gadiloikatititewaji. <sup>2</sup>Niginoa ganiliicagajetecidi ja neladi. Ipilagawaana ja yelio gadowoodi libinienaga. <sup>3</sup>Ganibeexo codaa me ganioolo ja digowi. Odaa nigica ligowiiga ikee makaami nilaagetedipi. Nigini ligowiiga micataga daga yelio gadoolatedi, liciagi noledi me yalegi, odaa ja yaagadi gadolaadi. Igaataga niginoa nokododi mategogoteeni ganiliicagajetecidi jogowidijedi nokododi nigina iigo. <sup>4</sup>Digawinitiwaji! Jaganinaalenitiniwace codaa agediani gadiimetedipi ane nibaagateloco gadixogotagi. Odaa Aneotedogoji aneliodi loniciwaga ja wajipatediogi me dinalomege. <sup>5</sup>Nigida makaamitiwaji inokoleetibige me gadilakiitiniwace, codaa makamaga adinocaganegeni me oniteloco nigina iigo. Jigidaa nagakaami ajakalodipi, odaa Aneotedogoji ja igo me gadaagatitewaji, liciagi monigodi wacali ajakalodi baanaga icota mele monigodi moyeligo. <sup>6</sup>Odaa ja galaagetedipi codaa manigoti nigijo oko anele, ane digicata mowo ane beyagi, codaa agica nimawenegegi dogodoojetetagawa.

### Leeditibige me idinatiigatalo gadawikodico codaa leeditibige me jotaganegenaga Aneotedogoji

<sup>7</sup>Akaami inioxoadipi, adinatiitalo gadawikodico nigepaagicota lanokegi Goniotagodi. Digawinitiwaji! Nigina bajendeoodi nibeotege me ili niginoa elanigijedi nigepaagicota limedi me yopilagaditedio. Niginoa lawodigijedi eliodi niwalótema, pida adogowikomata migetaga nipadi me nibeotege limedi ebicitedi. <sup>8</sup>Akaamitiwaji jigidaagenitiwaji, manibeonitege codaa jinagagowikomataa. Pida oleetibige matiteteloco gatiwagatakanegegi, igaataga ja nipegi lanokegi Goniotagodi.

<sup>9</sup>Inioxoadipi, jinaga alaagetedeta eledi oko amanagawini Aneotedogoji aiwi anigotedagawatiwaji. Nigica lanokegi Goniwinogodi ja nipegi. <sup>10</sup>Inioxoadipi, analakitibigetiwaji nigijo anoyelogoditedibece Aneotedogoji lowooko, odaa awii digo mijotaga. Nawikodeega leegodi moditece Aneotedogoji ane iigete, pida odinatitalo inoatawece ane lawikodico. <sup>11</sup>Digowootiwaji! Jakataga ina me ninitibigiwaji nigijo oko ane datitetiniwace, codaa me dogoika monakato Aneotedogoji, nigijo me nawikodeega. Codaa jagajipaataatiwaji natematigigi Jó, me dinatitalo owidi lawikodico. Codaa owoogotiwaji nigijo me dawikode, odaa nigidiaagidi Aneotedogoji ja yaxawa, odaa owidi nigicoa ane yajigote anele. Ewi Aneotedogoji meliodi meletedogodomi, codaa meliodi me godiwikode.

<sup>12</sup>Akaami inioxoadipi, ejitagawatiwaji nigina ane dagaxa mida ane jaoga. Nigina mawii gagegi mawii okanicodaagica gabakedi, jinagabakeni liboonagadi niginiwa ane ideite ditibigimedi, otegexaagaga niginoa aninoa digoina iigo, otegexaagaga okanicodaagica gaantigica



(Tiago 5.12)

eledi. Pida nigina madinilakidenitege eledi oko, onexaageni, “Jao!”, ogoa domige eni, “Ajao!” Odaa nigina midaga alitigi gagegi motagani, odaa Aneotedogoji agakaami lagetedipi nige dagabo mawii nigijo ane gagegi.

<sup>13</sup>Nigica oko gadiwigotigitiwaji ane dawikode, ipokitalo Aneotedogoji me yaxawa. Nigica aneliodi me ninitibece, ele me digaanagatibigimece Aneotedogoji. <sup>14</sup>Nigica ane deelotika, odaa aniditiogi lacilodi anoiige loiigi Aneotedogoji moyatecogoteloco, odaa odipokoteloco me yaxawa Aneotedogoji. Codaa leeditibige moyatita najidi lacilo, oibake Liboonagadi Goniotagodi modipokotalo. <sup>15</sup>Nigidiwa lacilodi nigoyiwagadi Goniotagodi me icilatidi nigina eelotaginaga nigina modipokoteloco, odaa ici. Nigica loenatagi ane beyagi nigina eelotaginaga, nigodipokotalo Goniotagodi, odaa Goniotagodi ja iwilegitetema laalegena libeyacegeco.

<sup>16</sup>Enice adinatematiitiwage nigina me idatibece gabeyacegegi, codaa ipokiteloco miniwataga Aneotedogoji nigina eledi oko ane neelotikanaga, amanagawini Aneotedogoji gadicilatititewaji. Nigina oko ane igenaga lewiga nige dipokotalo Aneotedogoji, odaa lipoketegi ida eliodi loniciwaga, igaataga Aneotedogoji idioka limedi me wajipate nigini oko.

<sup>17</sup>Elias inaagina goneleegiwa digo mokotaga. Pida eliodi me yotaganege Aneotedogoji. Odaa ja dipokotalo me daga datiode. Odaa agaleegica ebici degenitiniigiigo nigicoatigilo itoatadigida nicaagape nigigo meeya. <sup>18</sup>Pida nigidiaagidi naga ixomagatedijo nigijoa nicaagape, odaa ja yotaganegetace Aneotedogoji, dipokota me datiode. Odaa Aneotedogoji ja niwakatee eliodi ebici, odaa ja ilitace nawodigijedi.

<sup>19-20</sup>Inioxoadipi, nigica nigina akaamitiwaji aneyamagatice, odaa ja ika me dioteci naigi anewi, pida nigica eledi oko aneo mopitalo Goniotagodi nigijo aneyamagatice, ele manalakitibigetiwaji, nigina aneo nigijo

aneyamagatice mopitalo Goniotagodi, codaa me yaxawa me ika naigi ane beyagi, nigini oko ane yaxawa eledi oko jegeo nigina oko abeyacegegi me dagadiaa leegitalo me yototedice Aneotedogoji, codaa eo Aneotedogoji me ixomagateedice nigicoa anowidi libeyacegeco nigini oko.